

四庫全書

史部

欽定四庫全書

史部

明史卷一百五十五至

御史_臣李陽斌覆勘

總校官編修_臣朱鈴

欽定四庫全書

明史卷一百五十五

大學士

張廷玉等奉 敕修

列傳第四十三

宋晟

薛

祿

郭金

義玉

劉榮

朱榮

費獻

譚廣

陳懷

蔣貴

孫

琬

任禮

趙安

趙輔

劉聚

宋晟字景陽定遠人父朝用兄國興竝從渡江皆積功至元帥攻集慶國興戰歿晟嗣其職既而朝用請老晟方從鄧愈克徽州召還襲父官累進都指揮同知歷鎮江西大同陝西洪武十二年坐法降涼州衛指揮使十七年五月討西番叛酋至亦集乃路禽元海道千戶額森特穆爾國公吳巴圖爾齊等俘獲萬八千人送酋長

京師簡其精銳千人補卒伍餘悉放遣召還復為都指揮進右軍都督僉事仍鎮涼州二十四年充總兵官與都督劉真討哈瑪爾其地去肅州千餘里晟令軍中多具糧糗倍道疾馳乘夜至城下質明金鼓聲震地闔城股栗遂克之禽其王子埒爾錦特穆爾及偽國公以下三十餘人收其部落輜重以歸自是番戎懾服兵威極于西域明年五月從藍玉征罕東徇阿珍川土酋哈繼等遁去師還調中軍都督僉事二十八年六月從總兵

官周興出開原至和喇江部長桑阿遁追至布達密城
俘其人畜而還明年拜征南右副將軍討廣西悒悒諸
寨苗禽斬七千餘人又明年總羽林八衛兵討平五開
龍里苗三十一年出鎮開平從燕王出塞還城萬全諸
衛建文改元仍鎮甘肅成祖即位入朝進後軍左都督
拜平羌將軍遣還鎮永樂三年招降巴圖特穆爾婁多
爾呼等部落五千人獲馬駝牛羊萬六千封西寧侯祿
千一百石世指揮使晟凡四鎮涼州前後二十餘年威

信著絕域帝以晟舊臣有大將材專任以邊事所請奏
輒報可御史劾晟自專帝曰任人不專則不能成功况
大將統制一邊寧能盡拘文法即敕晟以便宜從事晟
嘗請入朝報曰西北邊務一以委卿非召命毋輒來尋
命營河西牧地及圖出塞方畧會病卒五年七月也晟
三子長瑄建文中為府軍右衛指揮使戰靈璧先登斬
數級力鬪死瑄弟琥尚成祖女安成公主得嗣侯于世
泰八年佩前將軍印鎮甘肅十年與李彬捕叛酋婁達

哈俘斬甚衆召還洪熙元年坐不敬奪爵并削駙馬都尉官宣德中復都尉琥既廢弟瑛嗣瑛尚咸寧公主正統中歷掌左軍前府事衛拉特額森入寇瑛充總兵官督大同守將朱冕石亨等戰陽和全軍敗沒瑛冕皆戰死贈鄆國公謚忠順子傑嗣景泰中典禁兵宿衛以謹慎稱卒子誠嗣署右府事復佩平旄將軍印鎮甘肅誠有材武嘗出獵至涼州遇寇掠牛馬北去誠三矢殪三人寇驚散盡驅所掠還九傳至孫裕德死流寇難

薛祿膠人行六軍中呼曰薛六既貴乃更名祿祿以卒
伍從燕起兵首奪九門真定之戰左副將軍李堅迎關
鋒始交祿持梁刺堅墜馬禽之擢指揮僉事從援永平
下大寧富峪會州寬河還救北平先驅敗南軍游騎進
指揮同知攻大同為先鋒戰白溝河追奔至濟南遷指
揮使戰東昌以五十騎敗南兵數百時成祖為盛庸所
敗還走北平庸檄真定諸將屯威縣深州邀燕歸路祿
皆擊走之戰滹沱河右軍却祿馳赴陣出入數十戰破

之追奔至夾河斬馘無算戰單家橋為平安所執奮脫縛拔刀殺守卒馳還復戰大敗安軍掠順德大名彰德攻西水寨生禽都指揮花英乘勢下東阿東平汶上連戰淝河小河靈壁功最入京師擢都督僉事永樂六年進同知八年充驍騎將軍從北征進右都督十年上言自古用人必資豫教今武臣子弟閒暇不教恐緩急無可使者帝韙其言會四方送幼軍數萬至悉隸祿操習之十五年以行在後軍都督董瑩造十八年十二月定

都北京授奉天靖難推誠宣力武臣封陽武侯祿千一百石二十一年將石哨從北征還討平長興盜二十二年再領石哨從北征仁宗即位命掌左府加太子太保予世券洪熙元年充總兵官備禦塞外尋以獲寇功益祿五百石是年頒諸將軍印于各邊鎮祿佩鎮朔大將軍印巡開平至大同邊宣宗即位召還陳備邊五事尋復遣巡邊宣德元年從征樂安為前鋒高煦就禽留祿與尚書張本鎮撫之明年春奉詔巡視畿南諸府城池

嚴戒軍士毋擾民違者以軍法論是夏復佩大將軍印
北巡開平還駐宣府敵犯開平無所得而退去城三百
餘里祿帥精兵晝伏夜行三夕至縱輕騎蹂敵營破之
大獲人畜師還敵躡其後復奮擊敗之敵由是遠遁召
還三年從北征破敵于寬河留鎮薊州永平復數佩鎮
朔印巡邊護餉出開平宣府間五年遇敵于鳳凰嶺斬
獲多加太保上言永寧衛團山及鵲鴉赤城雲州獨石
宜築城堡便守禦詔發軍民三萬六千赴工精騎一千

五百護之皆聽祿節制臨行賜詩以山甫南仲為比祿武人不知書以問楊士奇士奇曰上以古賢人待君也祿拊心曰祿安敢望前賢然敢不勉圖報上恩萬一其年六月有疾召還踰月卒贈鄞國公謚忠武祿有勇而好謀謀定後戰戰必勝紀律嚴明秋毫無犯善撫士卒同甘苦人樂為用北平諸功臣張玉朱能及祿三人為最而祿逮事三朝巍然為時宿將孫詵嗣至曾孫翰卒無子族人爭襲久之不得請因宅竝入官世絕者三十

餘年萬厯五年乃復封翰族子張為侯再傳至濂崇禎
末京師陷被害永樂中從起兵北平後積功至大將封
侯伯不以燕師功者薛祿及郭義金玉劉榮朱榮凡五
人而義玉與祿同日封云郭義濟寧人洪武時累功為
燕山千戶從成祖入京師累遷左都督永樂九年坐曠
職謫交趾立功已而宥之數從出塞有功封安陽侯祿
千一百石亦授奉天靖難武臣號時義在南京疾革聞
命而卒金玉江浦人襲父官為羽林衛百戶調燕山護

衛從起兵有功累遷河南都指揮使永樂三年進都督
僉事八年充鷹揚將軍從北征師旋為殿至長秀川收
敵所棄牛羊雜畜亘數十里十四年討平山西妖賊劉
子進論前後功封惠安伯祿九百石十九年卒妻田氏
自經以殉贈淑人

劉榮宿遷入初冒父名江從魏國公徐達戰灰山黑松
林為總旗給事燕邸雄偉多智畧成祖深器之授密雲
衛百戶從起兵為前鋒屢立戰功徇山東與朱榮帥精

騎三千夜襲南軍于滑口斬數千人獲馬三千禽都指揮唐禮等累受都指揮僉事戰滹沱河奪浮橋掠館陶曹州大獲還軍救北平敗平安軍于平村楊文以遼東兵圍永平江往援文引却江聲言還北平行二十餘里巷甲夜入永平文聞江去復來攻江突出掩擊大敗之斬首數千禽指揮王雄等七十一人遷都指揮使從至肥河與白義王真以輕騎誘致平安敗之時南軍駐宿州積糧為持久計成祖患之議絕其餉道命江將三千

人往趙趙不行成祖大怒欲斬之諸將叩首請乃免渡江策功以前罪不封止授都督僉事遷中府右都督永樂八年從北征以遊擊將軍督前哨乘夜據清水源敗敵鄂諾河復敗阿嚕台於靖虜鎮師還為殿即軍中進左都督遣鎮遼東敵闌入殺官軍帝怒命斬江旣而宥之九年復鎮遼東十二年再從北征仍為前鋒將勁騎偵敵飲馬河見敵騎東走追至剛哈拉海擊斬數十人復與大軍合擊瑪哈木特于和實衮下馬持短兵突

進斬獲多受上賞復充總兵官鎮遼東倭數寇海上北
抵遼南訖浙閩瀕海郡邑多被害江度形勢請于金線
島西北望海塢築城堡設烽堠嚴兵以待十七年六月
瞭者言東南海島中舉火江急引兵赴塢上倭三十餘
舟至泊馬雄島登岸奔望海塢江依山設伏別遣將斷
其歸路以步卒迎戰倭却賊入伏中礮舉伏起自辰至
酉大破賊賊走櫻桃園空堡中江開西壁縱之走復分
兩路夾擊盡覆之斬首千餘級生禽百三十人自是倭

大創不敢復入遼東詔封廣寧伯祿千二百石予世券
始更名榮尋遣還鎮明年四月卒榮為將常為軍鋒所
向無堅陣馭士卒有紀律恩信嚴明諸款塞者撫輯備
至既卒人咸思之贈侯謚忠武子湍嗣卒無子弟安嗣
正統十四年與郭登鎮大同額森擁英宗至城下邀登
出見登不可安出見伏哭帝前景帝降敕切責安馳至
京師言奉上皇命來告敵情且言進已為侯羣臣交劾
下獄論死會京師戒嚴釋安充總兵官陣東直門寇退

進都督同知守備白羊口復伯爵英宗復位予世侯兩
孟祿三百石曹欽反安被創加太子少傅成化中卒贈
嶧國公謚忠僖傳爵至明亡

朱榮字仲華沂人洪武十四年以總旗從西平侯沐英
征雲南累官副千戶守大寧降于成祖襲孫霖于滑口
圍定州斷南軍餉道大小二十餘戰論功授都督僉事
永樂四年從新城侯張輔征交趾破難陵關會沐晟於
白鶴輔等議于嘉林江上流濟師遣榮陣下流十八里

日增其數以惑賊又作舟筏為欲濟狀以牽制之賊果
分兵渡江登岸榮等奮擊大破之大軍進克多邦城榮
功為多帝以榮膏急事師還論功僅擢右都督賜白金
鈔幣七年復從輔討賊餘黨平之明年督右掖從征阿
魯台與劉榮竝進左都督十二年復從北征與榮俱為
前鋒其冬充總兵官鎮大同修忙牛嶺兔毛河赤山榆
楊口來勝諸城寇不敢近居三年召還十八年代劉榮
鎮遼東二十年復從北征為前鋒駐鵬鶚訶寇以五千

騎視敵所向大軍次玉沙泉榮帥銳士三百人入三馬
齎二十日糧深入敵已棄牛羊馬駝北走悉收之焚其
輜重移師破烏梁海師還封武進伯祿千二百石仍鎮
遼東二十二年復從北征已還鎮洪熙元年佩征虜前
將軍印鎮如故其年七月卒于鎮贈侯謚忠靖子冕嗣
以晉王濟煥新廢命鎮山西尋召還六年命輸餉獨石
因巡其地正統四年佩征西將軍印鎮大同十四年從
北征戰於陽和死之謚忠愍子瑛嗣傳爵至明亡

費祿定達人祖愚洪武時為燕府左相改授燕山中護衛指揮使傳子肅至祿從成祖起兵有功累進後軍都督僉事永樂八年春涼州衛千戶呼巴永昌衛千戶額琳沁巴勒等叛衆數千屯據驛路新附巴延特穆爾等應之西鄙震動都指揮李智不能勝賊聲言攻永昌涼州城皇太子命祿往討至涼州智及都指揮陳懷以師會遂進兵鎮番遇賊于雙城祿擊其左懷等擊其右賊大敗走斬首三百餘級追奔至黑魚海獲賊千餘馬駝

牛羊十二萬呼巴等達遁乃班師十二年充總兵官鎮甘肅獻以肅州兵多糧少脫有調發猝難措置請以臨鞏稅糧付近邊軍丁轉運又以涼州多閒田請給軍屯墾從之洪熙元年予平尾將軍印永樂時諸邊率用宦官協鎮恣睢專軍務獻亦為所制仁宗知之賜璽書責之曰爾以名臣後受國重寄乃俯首受制于人豈大丈夫所為其痛自懲艾圖後效獻得書陳謝宣宗嗣位進右府左都督元年七月入朝封崇信伯祿千一百石從

征高煦次流河驛帝念前鋒薛祿軍少命獄帥兵益之
還予世畧復鎮甘肅二年沙州衛賊屢劫賽瑪爾堪及
伊蘭巴里貢使獄討破之明年卒于鎮獄為人和易善
撫士在鎮十五年境內寧謐子釗嗣從征鄧茂七還掌
都督府天順中受武定侯郭英次孫昭賂誣謫孫昌不
孝欲奪其爵法司請逮治詔解府事卒子淮嗣爵傳至
明亡乃絕

譚廣字仲宏丹徒人洪武初起卒伍從征金山為燕山

護衛百戶從成祖起兵以百騎掠涿州生得將校三十人戰白溝真定夾河咸有功屢遷指揮使留守保定都督韓觀帥師十二萬來攻廣以孤軍力拒四十餘日伺間破走之永樂九年進大寧都指揮僉事董建北京既而領神機營從北征充驍騎將軍十一年練軍山西明年從征九龍口為前鋒賊數萬憑岸廣命挽強士射之萬矢齊發死者無算乘勝夾擊賊大敗論功進都督僉事仁宗嗣位擢左都督佩鎮朔將軍印鎮宣府宣德三

年請軍衛如郡縣例立風雲雷雨山川社稷壇六年以宣府糧少請如開平獨石召商中鹽納粟以足兵食俱從之明年帝從戶部議令他衛軍戍宣府者悉遣還屯種廣上言臣所守邊一千四百餘里敵人窺伺竊發無時脫有警徵兵數百里外勢豈能及屯種之議臣愚未見其可帝以邊卒戍守有餘但命永樂中調戍者勿遣正統初朝議以托歡雖款塞狡謀未可測命廣及他鎮總兵官陳懷李謙王或圖上方畧廣等各上議大要謂

邊寇出沒不常為守禦為上策宜分兵扼要害而間遣
精銳巡塞外遇敵則量力戰守間諜以偵之輕兵以躡
之寇來無所得去有所懼則邊患可少弭帝納其言六
年十一月以禦敵功封永寧伯祿千二百石仍鎮宣府
八年乞致仕優詔不許明年十月召還陞見帝憫其老
免常朝是月卒年八十二謚襄毅廣長身多力奮跡行
伍至大將大小百餘戰未嘗挫衄在宣府二十年修屯
堡嚴守備增驛傳又請頒給火器于各邊將校失律即

奏請置罪而撫士卒有恩邊徼帖然稱名將嘗逞憤杖殺都司經歷又以私憾杖百戶竝為言官所劾置不問既卒吏部言非世券授其子序指揮使

陳懷合肥人襲父職為真定副千戶永樂初積功至都指揮僉事從平安南進都指揮使涖山西都司事再從張輔禽安南賊簡定從都督費瑄征涼州叛人虎保皆有功仁宗立進都督同知宣德元年代梁銘為總兵官鎮寧夏時官軍征交趾者屢敗詔發松潘軍援之將士

憚行千戶錢宏與衆謀詐言番叛帥兵掠麥匪諸族番人震恐遂反殺指揮陳傑等陷松潘疊溪圍威茂諸州指揮吳玉韓整高隆相繼敗績西鄙騷然詔遣鴻臚丞何敏指揮吳瑋往招之而命懷統劉昭趙安蔣貴帥師數萬隨其後瑋等至賊不順命瑋與龍州知州薛繼賢擊賊復松潘比懷至仍用瑋前鋒遂復疊溪降二十餘寨招撫復業者萬二千二百餘戶歸所掠軍民二千二百餘人事遂定進左都督厚賚金幣而絀瑋功不錄懷

留鎮四川在鎮驕縱不法干預民事受賕庇罪人侵奪
屯田笞辱僉事柴震等數為言官所劾帝降敕責讓復
以御史王禮彈章示之懷引罪置不問六年松潘勦都
北定諸族暨空郎龍溪諸寨番復叛懷遣兵戰敗指揮
安寧等死者三百餘人懷乃親督兵深入破草兒骨寨
進攻空郎乞兒洞賊敗斬首墜崖死者無算革兒骨賊
復聚生苗邀戰擊破之勦戮殆盡于是任昌牛心諸寨
番聞風乞降羣寇悉平久之巡按御史及按察使復奏

懷僭侈踰分每旦令三司官分班立有事跪白懷中坐
稱旨行遣且日荒于酒不飭邊備致城寨失陷宣宗怒
召懷還命文武大臣鞠之罪當斬下都察院獄宥死落
職正統二年以原官鎮大同時北人來貢者日給廩餼
為軍民累懷言于朝得減省居二年以老召還命理中
府事九年春與中官但住出古北口征烏梁海還與馬
亮等同封而懷得平鄉伯十四年扈駕北征死土木贈
侯謚忠毅子輔乞襲爵吏部言非世券執不許景帝以

懷死事許之輔卒子政請襲吏部執如初中旨許嗣政
鎮兩廣久自陳軍功乞世畧吏部復執不可詔予之政
卒子信嗣弘治中卒無子弟俊嗣指揮使馬亮淇人以
燕山衛卒從成祖起兵累功至都指揮僉事宣宗時官
至左都督烏梁海之役偕中官劉永誠出劉家口至黑
山大松林流沙河諸處遇賊勝之還封招遠伯是役也
王振主之故諸將功少率得封亮善騎射每戰身先士
卒所向克捷時稱驍將為伯三年卒謚榮毅

蔣貴字大富江都人以燕山衛卒從成祖起兵雄偉多力善騎射積功至昌國衛指揮同知從大軍征交趾及沙漠遷都指揮僉事掌彭城衛事宣德二年四川松潘諸番叛充右叅將從總兵官陳懷討之募鄉導絕險而進薄其巢一日十數戰大敗之進都指揮同知鎮守密雲七年復命為參將佐懷鎮松潘明年進都督僉事充副總兵協方政鎮守又明年諸番復叛政等分道進討貴督兵四千攻破任昌大寨會都指揮趙得宮聚兵以

次討平龍溪等三十七寨斬首一千七百級投崖墜水
死者無算捷聞進都督同知充總兵官佩平蠻將軍印
代政鎮守英宗即位以所統皆極邊奏增軍士月糧
正統元年召還為右都督阿勒台寇甘涼邊將告急命
佩平虜將軍印帥師討之賊犯莊浪都指揮江源戰死
亡士卒百四十餘人侍郎徐晞劾貴朝議以貴方選軍
甘州勢不相及而莊浪乃晞所統責晞委罪置貴不問
明年春諜報敵駐賀蘭山後詔大同總兵官方政都指

揮楊洪出大同迤西貴與都督趙安出涼州塞會勦貴
至魚兒海子都指揮安敬言前途無水草引還鎮守陝
西都御史陳鑑言狀尚書王驥出理邊務斬敬責貴立
功貴感奮會多爾濟巴勒懼罪連遣使入貢敵勢稍弱
貴帥輕騎敗之于狼山追抵石城已聞多爾濟巴勒依
阿勒台于烏拉納地貴將二千五百人為前鋒往襲副
將李安沮之貴拔劍厲聲叱安曰敢阻軍者死遂出鎮
夷間道疾馳三日夜抵其巢阿勒台方牧馬貴猝入馬

羣令士卒以鞭擊弓韞驚馬馬盡佚敵失馬挽弓步鬪
賁縱騎蹂擊指揮茂哈喇奮入其陣大敗之復分軍為
兩翼別遣百騎乘高為疑兵轉戰八十里會任禮亦追
敵至黑泉阿勒台與多爾濟巴勒以數騎達遁西邊悉
平三年四月王驥以捷聞論功封定西伯食祿一千二
百石給世券明年代任禮鎮甘肅又明年冬以征麓川
蠻思任發召還京六年命佩平蠻將軍印充總兵官與
王驥帥師抵金齒分路進搗麓川上江寨破木籠山七

寨及馬鞍山象陣功皆第二事詳王驥傳明年師還進封侯益祿三百石八年夏復佩平蠻將軍印與王驥討思任發子思機發攻破其寨明年師還賞賚甚渥加歲祿五百石是役也貴子雄秉敵敗帥三十人深入敵扼其後自刎沉于江贈懷遠將軍彭城衛指揮使十四年正月貴卒年七十贈涇國公謚武勇貴起卒伍不識字天性朴實忘已下人能與士卒同甘苦出境討賊衣糧器械常身自囊負不役一人臨陣輒身先之以故所向

有功于義病不能嗣以義子琬嗣侯天順末佩平羌將
軍印總兵 肅築甘州沙河諸屯堡成化八年召還協
守南京兼督操江十年入督十二團營尋兼總神機營
兵上言太祖肇建南京京城外復築土城以衛居民誠
萬世之業今北京但有內城已已之變敵騎長驅直薄
城下可以為鑒今西北隅故址猶存亟行勸募之令濟
以工罰成功不難又言大同宣府諸塞下腴田無慮數
十萬悉為豪右所占畿內八府良田半屬勢要家細民

失業脫使邊關有警內郡何資運道或梗京師安給請
遣給事御史按覈塞下田定其科額畿內民田嚴戢豪
右毋得侵奪庶兵民足食而内外有備章下所司雖不
盡行時論韙之十三年帥京軍安秋大同宣府陳機宜
十餘事皆報可十五年偕汪直按遼東邊事二十年佩
將軍印出禦邊寇寇退班師累加太保兼太子太傅卒
贈涼國公謚敏毅子驥嗣典京營兵弘治中充總兵官
歷鎮薊州遼東湖廣官中外二十年家無餘貲再傳至

孫傳嘉靖中累典軍府佩征蠻將軍印鎮兩廣以平海賊及慶遠徠功加太子太保明亡爵絕

任禮字尚義臨漳人以燕山衛卒從成祖起兵積功至山東都指揮使永樂二十年擢都督僉事從北征前行偵敵還受厚賞仁宗即位命掌廣西都司事尋改遼東宣宗立進都指揮同知從平樂安又從征烏梁海還為後拒英宗立進左都督正統元年佩平羌將軍印充左副總兵鎮甘肅阿勒台多灞濟巴勒數犯肅州璽書謀

讓二年復寇莊浪都指揮魏榮擊却之禽多爾濟巴勒
姪巴圖博羅禮以聞三年與王驥蔣貴出塞敗多爾濟
巴勒于石城分道至梧桐林額齊納進至黑泉而還
斬獲多封寧遠伯祿千二百石明年還朝又明年代貴
鎮甘肅八年赤斤蒙古衛都督且旺錫嘉苦額森暴橫
欲移駐伊魯布拉克禮以其地近肅州執不許已奏請
建寺于其地禮復言建寺彼必移居遺後患事竟
寢時邊將家僮墾塞上田者每頃輸糧十二石禮連請

於朝得減四石是時邊塞無警禮與巡撫曹翼屯田積粟繕甲訓兵邊備甚固十一年沙州衛都督納格兄弟爭部衆離貳禮欲乘其饑窘遷之內地會納格亦請居肅州境內禮因遣都指揮茂哈喇往撫其衆而親帥兵繼其後比至納格復持兩端其部下欲奔衛拉特禮進兵逼之遂收其全部千二百餘人以還事聞賜賚甚厚時衛拉特額森方盛封納格弟索諾木本為祁王禮以二寇合則勢益難制遣人招之

欲從未決禮潛

師直抵軍東繫之以歸帝大喜賜禮鐵券令世襲十四年額森分道入寇抵肅州禮遣裨將禦之再戰再敗失士馬萬計徵還以伯就第景泰初提督三千營以老致仕久之復起守備南京入掌中府禮自起卒伍至大將恪謹奉法成化初卒贈侯謚僖武子壽嗣總兵鎮陝西坐征滿四失律宥死戍邊子弘于世指揮使

趙安狄道人從兄琦土指揮同知坐罪死安謫戍甘州永樂元年進馬除臨洮百戶使西域從北征有功累進

都指揮同知宣德二年松潘番叛充左參將從總兵陳懷討平之進都督僉事時議討烏梁海詔安與史昭統所部赴京師烏梁海旋來朝命回原衛使烏斯藏四年還明年復以左參將從史昭討庫森斬獲多九年中官宋成等使烏斯藏命安帥兵千五百人送之必琳滿江尋與侍郎徐晞出塞討阿勒台多爾濟巴勒敗之正統元年進都督同知充右副總兵官協任禮鎮甘肅明年與蔣貴出塞勦寇無功三年復與王驥任禮蔣貴

進師至乃力清執右丞達嚕噶齊等三十人以功封會
川伯祿千石明年移鎮涼州安家臨洮姻黨所養多為
盜副使陳斌以聞在涼州又多招無賴為僮奴擾民復
為御史孫毓所劾詔皆不問安勇敢有將畧與貴禮竝
稱西邊良將九年十二月卒子英為指揮使立功進都
督同知

趙輔字良佐鳳陽人襲職為濟寧衛指揮使景帝嗣位
尚書王直等以將才薦擢署都指揮僉事充左參將守

懷來天順初徵入右府蒞事成化元年與中府都督同知拜征夷將軍與韓雍討兩廣蠻克大藤峽還封武靖伯已而蠻入潯州言官交劾廣西巡按御史端宏謂賊流毒方甚而輔妄言賊盡冒封爵不罪輔無以示戒輔乃自陳戰伐委其罪于守將歐信帝皆不問三年總兵征迤東與都御史李秉從撫順深入連戰有功進侯八年廷議大舉搜河套拜輔將軍陝西延綏寧夏三鎮兵皆聽節制輔至榆林寇已深入大掠輔不能制與王越

疏請罷兵言官交論其罪命給事中郭鏜往勘還言寇
于六月入平涼鞏昌臨洮殺掠人畜迨七月而縱橫慶
陽內境輔與越至榆林不進宜治其弛兵玩寇罪帝不
納輔還猶督京營言者攻益力詔姑置之輔辭侯乞世
伯帝許其世伯侯如故僅減祿二百石言官力爭不聽
輔復上疏暴功言減祿無以贍老又言上命內官盧永
征南蠻黃順汪直征東北皆莫大功宜付史館余子俊
等請寘輔于法卒不問十二年解營務家居十年卒贈

容國公謚恭肅輔少俊辯有才善詞翰多交文士又好結權幸故屢遭論劾卒無患子承慶嗣伯協守南京正德初坐傳寫諫官劉蒞疏為劉瑾所惡削半祿閒住四傳至元孫光達萬厯中鎮湖廣明亡乃絕

劉聚者太監永誠從子也為金吾指揮同知以奪門功進都指揮僉事復超擢都督同知與討曹欽進右都督成化六年以右副總兵從朱永赴延綏追賊黃草梁遇伏鏖戰傷類麾下力捍以免頃復與都督范瑾等擊寇

青草滿敗之永等追寇牛家砦聚亦據南山力攻寇大敗七年論功進左都督以內援特封寧晉伯八年冬代趙輔為將軍總陝西諸鎮兵寇入花馬池率副總兵孫鉞遊擊將軍玉璽等擊却之還至高家堡寇復至敗之追至漫天嶺伏起夾擊又敗之鉞璽亦別破賊于井油山捷聞予世券是年博勒呼們都埒奇木嘉色稜連兵深入至秦州安定會寧諸州縣縱橫數千里賊退適王越自紅鹽池還妄以大捷聞璽書嘉勞頃之紀功兵

部員外郎張謹劾聚及總兵官范瑾等六將殺被掠者
冒功部科及御史交章劾詔遣給事中韓文往勘還奏
如謹言所報首功百五十僅十九級帝以寇既遁置不
問聚尋卒贈侯謚威勇傳子祿及福福弘治中掌三千
營加太子太保卒子岳嗣卒從子文請嗣吏部言聚無
大功子孫不宜再襲世宗不允命文嗣亦傳至明亡乃
絕

贊曰宋晟在太祖時即與開國諸元勳參迹戎行其後

四鎮涼州威著西鄙而子尚主世列徹侯功名盛矣薛
祿諸人皆從北平起事祿東昌滹沱之戰劉榮守
永平譚廣守保定宣力最著雖策勲之日未即剖符而
各以積閔受封其善撫士卒慎固封守恪謹奉職有足
尚者趙輔劉聚猷績遠遜前人而帶礪之盟與國終始
誠厚幸哉諸人竝以勲爵鎮禦邊陲故類著於篇

明史卷一百五十五

欽定四庫全書

明史卷一百五十五考證

宋晟傳洪武十二年坐法降涼州衛指揮使

臣方煒

按宋晟降涼州指揮史不詳坐法原委考獻徵錄但云十二年掌涼州衛不言降官謹識闕疑

宋晟傳仍鎮涼州

臣

方煒按傳後云晟四鎮涼州而

傳中歷叙官闕鎮涼州者僅二考獻徵錄云十五年父病召還侍又三年父歿復鎮涼州此時始載討叛

事後又云召還京獎諭再四賞賚甚厚復鎮涼州至十九年召還始陞右軍都督合前後計之鎮涼州者凡四史漏中二事與後文不合謹識

薛祿傳行六軍中呼曰薛六

臣

方煒按傳維鱗明書

云薛祿初名貴史作行六軍中呼曰薛六彼此互異獻徵錄止言行六不言稱名謹識

薛祿傳授奉天靖難推誠宣力武臣封陽武侯

臣方

煒按靖難字樣前卷已遵

御批通鑑輯覽改為北平此處靖難字乃原定功臣封號難

於更改謹考訂而仍其舊

薛祿傳祿千一百石

臣方煒按薛祿封侯食祿獻徵

錄傳維鱗明書俱作千五百石史作千一百石名臣

實錄與史同謹識闕疑

薛祿傳遇敵於鳳凰嶺

臣方煒按鳳凰嶺獻徵錄作

奇黃嶺名臣實錄與史同謹識

薛祿傳

郭義附

亦授奉天靖難武臣號

臣方煒按靖

難字樣前卷已遵

御批通鑑輯覽改為北平此處靖難字乃原定功臣封號未便更改應考訂而仍其舊

劉榮傳江度形勢請於金線島西北望海窩築城堡

臣方燁按地理志金線島在遼東金州衛東南又東南有望海碭至馬雄島櫻桃園俱不見地理志謹識

劉榮傳斬首千餘級生擒百三十人

臣方燁按斬首

千餘級生擒百三十人傳維鱗明書作斬首七百四

十二捕生八百五十七彼此互異謹識闕疑

朱榮傳僅擢右都督

臣方煒按張輔傳稱榮驃騎將

軍此傳畧之謹識

朱榮傳修北忙牛嶺兔毛河赤山榆楊口來勝諸臣

臣方煒按地理志大同有兔毛川赤兔山傳作兔毛

河赤山彼此小異忙牛嶺榆楊口來勝不見地理志

謹識

朱榮傳駐鵬鶚詞寇以五千騎視敵所向大軍次玉沙

泉

臣方煒按鷓鴣王沙泉俱不見地理志謹識

朱榮傳祿千二百石

臣方煒按朱榮食祿傳維鱗明

書作千三百石史作千二百石彼此小異謹識

費巘傳遇賊於雙城巘擊其左懷等擊其右賊大敗走

斬首三百餘級追奔至黑魚海

臣方煒按雙城黑

魚海俱不見地理志惟有黑水在鎮番衛西或即黑

魚海之別名歟謹識闕疑

譚廣傳在宣府二十年修屯堡嚴守備增驛傳

臣方

煒按獻徵錄云廣初所統神機軍鮮明晃耀進止有
度望者皆曰譚家馬也上有所指揮亦曰譚家馬至
敵人相戒亦曰毋犯譚家馬迄今猶以為號所得祿
賜不以私嘗出為學舍浮屠老子宮之用史俱畧之
謹識

陳懷傳與馬亮等同封而懷封平鄉伯
臣方煒按陳

懷封平鄉伯馬亮封招遠伯俱不言食祿之數當屬
遺漏諸書俱無可考謹識闕疑

陳懷傳

馬亮附

懷偕中官劉永誠出劉家口至黑山大

松林流沙河諸處遇賊勝之

臣方煒按劉家口黑

山大松林流沙河地理志俱不載謹識

蔣貴傳討平龍溪等三十七寨斬首一千七百級

臣

方煒按獻徵錄云乃大閱士連破黑號等四十餘寨
斬首千五百級生擒稱是與史所稱小異謹識

蔣貴傳諜報敵駐賀蘭山

臣方煒按地理志賀蘭山

寧夏衛西魚兒海子狼山石城俱不見地理志謹識

闕疑

蔣貴傳會任禮亦追敵至黑山 臣方煒按黑泉不見

地理志謹識

蔣貴傳與王驥討思任發子思機發攻破其寨 臣方

煒按獻徵錄云賊父子既遁於緬甸八年命貴與尚
書下緬取賊時緬人數報送至而潛以金樓船載賊
離五十里而不至尚書謂貴曰此紿我也過江則絕
我歸路矣於是誘緬人聽賞則往焚其舟大戰一晝

夜賊首已先去賊子思機發在孟牙亦遁去盡俘其妻孥以還破其賊寨二百餘處焚夷遂平較史為詳

謹識

蔣貴傳加歲祿五百石

臣方煒按加祿五百石獻徵

錄作二百石彼此小異謹識闕疑

任禮傳分道至梧桐林

臣方煒按梧桐林不見地理

志謹識闕疑

趙安傳從兄琦任指揮同知坐罪死

臣方煒按趙琦

之死傳維鱗明書與史同均不詳坐罪原委他書無
可考謹識闕疑

趙安傳中官宋成等使烏斯藏命安帥兵千五百人送
之必琳滿江臣方煒按必琳滿江不見地理志謹
識

趙輔傳封武靖伯臣方煒按封爵當載食祿之數武
靖之封不言食祿則後段減祿二百石之文便無根
據考傳維鱗明書云食祿千二百石謹識

劉聚傳追賊黃草梁

臣方煒按黃草梁青草溝朱家

砦高家堡漫天嶺井油山俱不見地理志謹識

劉聚傳以內援特封寧晉伯

臣方煒按劉聚之封史

遺食祿之數考傳維鱗明書云封寧晉伯食祿千石

謹識

明史卷一百五十五考證

欽定四庫全書

明史卷一百五十六

大學士張廷玉等奉敕修

列傳第四十四

吳允誠

子克忠
孫瑾

薛斌

子駿弟貴
李賢

吳成

滕定
金順

金忠

蔣信

李

英

從子文

毛勝

焦禮

毛忠

孫銳

和勇

羅秉忠

吳允誠蒙古人名巴圖特穆爾居甘肅塞外塔溝地官至平章永樂三年與其黨婁多爾呼率妻子及部落五千馬駝萬六千因宋晟來歸帝以蒙古人多同名當賜姓別之尚書劉儁請如洪武故事編為勛合允誠得賜姓名授右軍都督僉事婁多爾呼亦賜姓名柴秉誠授後軍都督僉事餘授官賜冠帶給畜產鈔幣有差使領所部居涼州耕牧晟以招徠功封西寧侯自是降附者

益衆由允誠始七年往額齊訥覘敵禽哈喇
等二十餘人進都督同知明年從出塞敗布尼雅錫哩
進右都督尋進左都督與中官王安追庫特齊至巴哩
河獲之封恭順伯食祿千二百石予世券允誠三子達
蘭固爾珍克勤允誠與二子從軍留其妻及固爾珍居
涼州番人呼巴等誘脅允誠衆欲叛去允誠妻與固爾珍
謀召部將都指揮保濟巴延布哈等禽其黨誅之帝喜
降救獎之賜鰲鈔羊米甚厚授固爾珍指揮僉事保濟

賜姓名楊效誠授指揮僉事韃靼汗郭勒奔遇弒其下
多潰達蘭與伯爾克請出塞自效有功伯爾克者東誠
子也帝征衛拉特允誠父子皆從師還命仍居涼州備
邊允誠卒贈邵國公諡忠壯命達蘭更名克忠襲其爵
再征阿嚕台從行三征阿嚕台復從兄弟皆有功洪熙
元年以威里思克忠進侯時固爾珍已積功至都指揮
同知亦封廣義伯克忠嘗充副總兵巡邊正統九年統
兵出喜峯口征烏梁海有功加太子太保土木之變克

忠與其弟都督克勤子瑾為後拒寇突至驟戰不勝敵
兵據山上飛矢石如雨官軍死傷略盡克忠下馬射矢
竭猶殺數人與克勤俱歿於陣贈邵國公諡忠勇克勤
贈遵化伯諡僖敏瑾被執逃歸嗣侯英宗嘗欲使瑾守
甘肅辭曰臣外人若用臣守邊恐外商輕中國帝善其
言乃止曹欽反瑾與從弟宗聞變椎長安門上告門閉
欽攻不得入遂縱火瑾將五六騎與欽力戰死贈涼國
公諡忠壯予世券三傳至曾孫繼爵嘗守備南京傳子

汝陰孫惟英與繼爵皆總督京營戎政崇禎末都城陷
汝陰弟勲衛汝徵偕妻女投繯死固爾珍卒子玘嗣固
爾珍妻索諾木亦有智畧嘗親入朝獻良馬朝廷多其
忠玘卒固爾珍弟克勤于琮嗣鎮守寧夏成化四年滿
四反琮坐激變且臨陣先退下獄論死謫戍邊爵除
薛斌蒙古人本名托歡父蘇台洪武中歸附賜姓薛累
官燕山右護衛指揮僉事斌嗣職從起兵累遷都督僉
事從北征有功進都督同知永樂十八年封永順伯祿

九百石世指揮使斌卒子碩通方五歲從父貴引見仁宗立命嗣伯賜名綬長驍勇善戰正統十四年秋與成國公朱勇等遇敵於鷄兒嶺軍敗弦斷矢盡猶持空弓擊敵敵怒支解之既而知其本蒙古人也曰此吾同類宜勇健若此相與哭之謚武毅子輔孫勲竝得嗣伯勲子璽乃嗣指揮使如劬文貴本名托和齊斌之弟以舍人從燕王起兵屢脫王於險積官都指揮使再從北征進都督僉事永樂二十二年封安順伯祿九百石宣德

元年進侯加祿三百石予世畧卒贈濱國公諡忠勇無
子從子山嗣為指揮使天順改元以復辟恩命山子忠
嗣伯卒子瑤嗣弘治中卒子昂降襲指揮使李賢初名
緯緇韃靼人元工部尚書洪武二十一年來歸通譯書
太祖賜姓名授燕府紀善侍燕世子最恭謹北平師起
有勞績累遷都指揮同知凡塞外表奏及朝廷所降詔
敕皆命賢譯賢亦屢陳所見成祖皆採納之仁宗即位
念舊勞進後軍都督僉事再進右都督賜賚甚渥尋召

見憫其病封忠勤伯食祿千一百石尋卒

吳成遼陽人初名瑪魯父屯巴元遼陽行省右丞太祖時古通來降屯巴父子與俱瑪魯更令姓名充總旗數從大軍出塞建文元年授永平衛百戶降燕從戰皆有功三遷都指揮僉事始知名南軍聞吳瑪魯名多於陣上指目之設伏泚河進兵小河合戰齊眉山攻敗靈壁軍皆力戰功多成祖即位授都指揮使從征布尼雅錫哩疾戰布尼雅錫哩以七騎遁從征阿嚕台合朱榮兵

為前鋒進至科幹海召還進都督僉事又三從出塞洪
熙元年進左都督從陽武侯薛祿征大崧嶺為前鋒有
功增祿米宣宗初以成嘗宿衛東宮錄舊勞封清平伯
祿千一百石于世券從征樂安復與薛祿為前鋒事定
出守備興和成好畋獵而不修武備寇伺其出獵卒入
城掠其妻孥以去帝聞之置不問已而阿魯台入貢還
其家口三年帝北征從之賊於寬河進侯祿如故八年
卒贈渠國公諡壯勇于忠前死忠子英嗣伯卒子璽嗣

坐貪淫奪爵久乃復之卒無子從弟琮嗣四傳至元孫
遵用崇禎末京師陷被殺滕定父瓚任元樞密知院洪
武中來降授貴州衛指揮僉事賜姓滕從燕起兵進燕
山右衛指揮使卒定嗣官屢從出塞有功進至都督僉
事宣德四年封奉化伯祿八百石正統初卒于福嗣為
指揮使金順本名阿爾噶錫哩永樂中來降授大寧都
指揮僉事從敗布尼雅錫哩又敗阿嚕台累進都督僉
事宣德三年從巡北邊有斬捕功明年封順義伯祿八

百石卒子忠嗣為指揮僉事

金忠者蒙古王子額森托干也素桀黠為阿嚕台所忌
永樂二十一年成祖親征漠北至上莊堡率妻子部屬
來降時六師深入寇已遠遁帝方恥無功見其來歸大
喜賜姓名封忠勇王賜冠帶織金幣衣命坐列侯下輟
御前珍羞賜之復賜金銀寶器忠大喜過望班師在道
忠騎從數問寇中事眷寵日隆明年忠請為前鋒討阿
嚕台自效帝初不許會大同開平警報至諸將請從忠

言帝復出塞忠與陳懋為前鋒而阿魯台聞王師復出倉皇渡達蘭納穆爾河遁去忠懋至河不見寇抵白印山卒無所遇乃班師仁宗嗣位加太子太保竝支二俸宣德三年親征烏梁海敗寇於寬河忠與巴布台請自效帝許之或言不可遣帝曰去留任所欲耳朕有天下獨少此二人邪二人獲數十人馬牛數百來獻帝喜命中官酌以金卮遂賜之明年加太保六年秋卒命有司治喪葬巴爾台者忠之甥從忠來降授都督僉事宣德初

賜名蔣信正統中封忠勇伯從駕陷土木額森使隸賽
堪王帳下信雖居朔漠志常在中國每詣上皇所慟哭
擁衛頗至己竟從駕還詔復給其祿景泰五年卒贈侯
諡僖順子伊埒索郭襲爵天順初更名善弘治中卒無
子爵絕

李英西番人父囊格洪武中率衆歸附授西寧州同知
累功進西寧衛指揮僉事英嗣官永樂十年番酋婁達
袞叛英擊之討來川俘斬三百六十人夜雪賊遁追盡

獲之進都指揮僉事番僧張達爾瑪者通譯書成祖授以左覺義居西寧恣甚以計取西番貢使質納逋逃交通外域肆惡十餘年英發其事磔死籍其家西陲快之末年中官喬來喜鄧成等使西域道安定庫森遇賊見殺掠所齎金幣仁宗璽書諭赤斤罕東及安定庫森詰賊主名而救英與土官指揮康壽等進討英訶知安定指揮哈薩鐵蘇克庫森指揮薩哥蘇實殺使者遂率兵西入番驚走追擊踰崑崙山深入數百里至雅爾噶與

安定賊遇大敗之俘斬千一百餘人獲馬牛雜畜十四萬庫森賊聞風遁安定王桑爾節沙克旦等懼詣闕謝罪宣宗嘉英功遣使褒諭勞宴之令馳驛入朝既至擢右府左丞督賜賚加等宣德二年封會寧伯祿千一百石并封囊格如子爵英恃功而驕所為多不法寧夏總兵官吏昭奏英父子有異志囊格上章辯賜敕慰諭之英宗西寧招逋逃七百餘戶置莊墾田豪奪人產復為兵部及言官所劾帝宥英追逃者入官七年西寧指

揮祁震子成當襲父職庶兄嘉勒察英甥也欲奪之成
從祖太平攜成赴京辯英遣人篡取太平及其義兒杖
之義兒竟死言官交劾并及前罪遂下英詔獄奪爵論
死正統二年始釋後稍給其祿尋卒英宗復辟官其子
杲錦衣指揮同知尋進都指揮使用薦擢左軍都督僉
事屢分典籍務以嚴慎稱英從子文宣德間為陝西行
都司都指揮僉事西番思俄可嘗盜他部善馬都指揮
穆肅求不得會思俄可以畜產鬻于邊肅誣以盜收掠

致死番人惶駭思亂文劾之逮肅下吏西陲以寧累官
都指揮使天順元年冒迎駕功進都督僉事未幾以右
都督出鎮大同寇二千餘騎犯威遠文率師敗之封高
陽伯石亨敗革奪門冒功者官文自首帝以守邊不問
四年秋保濟大舉入寇文按兵不戰遂入鴈門大掠忻
代諸州京師震恐寇退徵文下詔獄論斬帝宥文死降
都督僉事立功延綏既而進都督同知成化中哈密為
土魯番所併求救於朝詔文與右通政劉文往甘肅經

畧之無功而還弘治初卒正德初贈高陽伯

毛勝字用欽初名福壽元右丞相巴爾布哈孫伯父
諾海洪武中歸附以北平功至都指揮同知無子勝父
安泰嗣為羽林指揮使傳子儋無子勝嗣論濟北征功
進都指揮使嘗逃歸塞外尋復自還正統七年以征麓
川功擢都督僉事靖遠伯王驥請遷在京番將舍人捕
苗雲南乃命勝與都督再保統六百人往已再征麓川
即命二人充左右叅將賊平進都督同知十四年夏額

森謀入寇勝偕平鄉伯陳懷等率京師三萬鎮大同懷
遇寇戰歿勝脫還以武清伯石亨薦景帝進勝左都督
督三千營操練貴州苗大擾詔勝往討未行而額森逼
京師勝禦之彰義門北擊退之越二日引兵西直門外
解都督孫鑑圍明日都督武興戰歿于彰義門寇乘勝
進勝與都御史王竑急援之寇遂引却勝追襲至紫金
關頗有斬獲事定乃命以左副總兵統河間東昌降夷
赴貴州賊首韋同烈據香爐山作亂勝與總兵梁缺右

副總兵方瑛等從總督王來分道夾擊之進自重安江
大破之會師山下環四面攻之賊窘縛同烈降還討湖
廣巴馬諸處反賊克二十餘寨禽賊首吳奉先等百四
十人斬首千餘級封南寧伯子世券疏請更名從之移
鎮滕衝金齒芒市長官刀放革潛結麓川遺孽思卜發
為變勝設策禽之巡按御史牟俸劾其貪暴不法數十
事且言勝本降人狡猾難制今又數通外夷恐貽邊患
詔巡撫覈實卒置不問天順二年卒贈侯諡莊毅子榮

嗣坐石亨黨發廣西立功成化初鎮貴州尋移兩廣卒
子文嗣弘治初協守南京傳爵至明亡乃絕

焦禮字尚節蒙古人父巴爾斯台歸附太祖為通州衛
指揮僉事子勝嗣傳至榮義無子以勝弟讓嗣累功至
都指揮同知卒子衮什訥幼讓弟禮偕襲其職備禦遼
東宣德初禮當還職宣宗念禮守邊勞命居職如故別
授衮什訥指揮使禮尋以年勞累進都指揮同知正統
中積功至右都督英宗北征景帝命充左副總兵守寧

遠未幾額森逼京師詔禮率師入衛寇退還鎮景泰四年賊二千餘騎犯興水堡禮擊走之璽書獎勵進左都督英宗復辟以禮守邊有功召入覲封東寧伯世襲賜賚甚厚遣還鎮兵部以禮年垂八十不可獨任奏遣都指揮鄧鐸協同守邊居無何禮奏鐸欺侮請更調命都指揮張俊代鐸天順七年卒於鎮贈侯諡襄毅禮有膽畧精騎射善以少擊衆守寧遠三十餘年士卒樂為用邊陲寧謐孫壽嗣爵卒無子弟俊嗣成化末歷鎮甘肅

寧夏弘治中掌南京前府兼督操江出鎮貴州湖廣俊
少事商販既貴能下士而折衝非所長卒子淇嗣嘗分
典京營正德中賄劉瑾出鎮兩府踰年卒弟洵嗣洵雖
嗣爵先業盡為淇妻所有生母卒無以莖哀憤得疾卒
無子以再從子陳嗣嘉靖中提督五軍營兼掌中府踰
十年改總兵湖廣卒贈太子太保諡莊僖傳爵至明亡
乃絕

毛忠字允誠初名哈喇西陸人曾祖哈喇岱洪武初歸

附起行伍為千戶戰歿祖拜達勒從征哈密亦戰歿父
寶以勇充總旗至永昌百戶忠襲職時年二十薨力
絕人善騎射常從太宗北征宣德五年征庫森叛寇有
功八年征伊伯格勒山為少師知院九年出托歡山十
年征黑山寇皆禽其酋各進一官歷指揮同知正統三
年從都督蔣貴征多爾濟巴勒先登陷陣大獲擢都指
揮僉事十年以勞進同知賜姓明年從總兵官
任禮收捕沙州衛都督訥格部落徙之塞內進都指揮

使十三年率師至罕東生繫訥格弟僞祁王索諾木本并其部衆擢都督僉事始賜名忠尋充右叅將協守甘肅景泰初侍郎李實使漠北還言忠數遣使通衛拉特詔執赴京既至兵部論其罪請置大辟景帝不許請貶官發福建立功乃遣之福建而官秩如故令甘肅守臣徙其家屬京師初忠之征沙漠也獲番僧扎什琳沁以獻英宗赦不誅後逃之衛拉特為額森用憾忠欲陷之宣言忠與額森交通而朝廷不察也英宗在塞外獨

知之化復辟即召還而忠在福建亦屢有斬馘功乃遷
都督同知充右副都統兵守甘肅陞見慰諭甚至賜玉
帶織金幣衣天順二年寇大入甘肅巡撫芮釗劾奏諸
將失事罪部議忠功足贖罪置不問三年以鎮番破賊
功進左都督五年保刺以數萬騎分掠西寧莊浪甘肅
諸道入涼州忠鏖戰一日夜矢盡力疲賊來益衆軍中
皆失色忠意氣彌厲拊循將士復殊死鬪賊見終不可
勝而援軍亦至遂解去忠竟死師還七年永昌涼州莊

浪塞外諸番為邊患忠與總兵官衛穎分討之忠先破巴鄂爾諸大族其贊咱瑪吉斯諸族他將不能下者忠復擊破之論功忠止增祿百石而穎乃得世券忠以為言遂封伏羌伯成化四年固原賊滿四據石城反詔忠移師討之與總督項忠等夾攻賊巢忠由木頭溝直抵駝架山下多所斬獲賊稍却之矢石連奪山北山西兩峰而項忠等軍亦克山之東峰及石城東西二門賊大窘相對哭忽昏霧起他哨舉烟掣軍賊遂併力攻忠

忠亦力戰不已為流矢所中卒年七十五從子海孫鎧前
救忠亦死忠為將嚴紀律善撫士其卒也西陲人弔哭
者相望於道事聞贈侯諡武勇予世券弘治中從有司
言建忠義祠于蘭州以表其理又從巡撫許進言建武
勇祠于甘州城東春秋致祭孫銳襄伯爵成化中協守
南京弘治初出鎮湖廣改兩廣平蠻賊累有功咸璽書
獎勵九年以廣西破賊增歲祿二百石言官劾銳廣置
邸舍私造大柵以通番商置不問思恩土官岑濬反與

總督潘蕃討平之既又討平賀縣獍賊加官至太子太傅正德三年劉瑾欲殺尚書劉大夏坐以處置田州事失宜并逮銳下詔獄獄具革其加官并歲祿五百石已而賄瑾起督漕運踰年瑾誅被劾罷六年盜劉宸等擾畿甸命銳與中官谷大用討之所統京軍皆驕惰不習戰明年正月遇賊于長垣與戰大敗身被傷亡將卽會許泰援軍至僅免言官交劾乃召還以與大用同事竟不罪世宗即位復起鎮湖廣居三年卒贈太傅諡威襄

傳于江及漢漢嘉靖中掌南京左府提督操江改總督
漕運未上給事中楊上林劾其所至貪墨詔褫職逮問
卒無子從子桓嗣卒子登嗣萬厯中掌中軍府垂二十
十年又再傳而明

和勇初名托克托博羅和寧王阿魯台孫也阿魯台為
衛拉特托歡所殺子諤博爾濟延窮蹙來歸宣
宗授以左都督賜第京師卒勇襲指揮使帶俸錦衣衛
積功至都督僉事天順元年詔加同知賜姓名久之以

兩廣多寇命充遊擊將軍統降夷千人往討時總兵顏彪無將略賊勢愈熾廣西巡撫吳禎殺降冒功得優賞彪效之亦殺平民報捷朝廷進彪官勇亦進右都督既而師久無功言官劾文武將吏之失事者詔停勇俸充為事官成化初趙輔韓雍征大藤峽賊詔勇以所部從征其冬賊大破進左都督增祿百石三年召督效勇營訓練尋上言大藤夾之西臣與趙輔同功輔還京餘賊復叛臣親搗賊巢繫其魁誅其黨還被掠男女四千人

令輔已封伯而臣止進秩惟陛下憐察憲宗以勇再著
戰功特封靖安伯十年卒諡武敏世襲指揮使勇性廣
謹在兩廣時諸將多營私漁利勇獨無所取時論

羅秉忠初名科爾羅領占沙州衛都督僉事琨齊子

也兄訥格既襲父職英宗復命秉忠為指揮使協理衛
事既而訥格率千二百人內徙詔居之東昌平山二衛
給田廬什器所以撫恤甚厚訥格卒秉忠為都指揮使
代領其衆英宗北狩塞上多警朝議恐降人乘機為變

欲徙之南方會貴州苗亂都督毛福壽南征即擢東忠
都督僉事率所部援勦積戰功至左都督天順初始賜
姓名曹欽之反番官多從之者東忠亦坐下獄籍其家
久之上章自辨乃得釋成化初尚書程信討山都掌蠻
東忠以遊擊將軍從既抵永寧分兵六道東忠由金鷲
江進大破之論功封順義伯十六年卒諡榮壯子孫世
指揮使

贊曰明興諸蒙古懷太祖功德多樂內附賜姓名授官

職者不可勝紀繼以成祖銳意遠圖震耀威武於是英
允誠金忠之徒率衆來屬遂得列爵授任比肩勲舊或
以戰功自奮錫券受封傳世不絕視夫陸梁倔強者順
逆殊異不其昭歟土木以還勢以不競邊政日弛和碩
語達諸部騷動無寧歲盛衰之故概可攷焉

明史卷一百五十六

欽定四庫全書

明史卷一百五十六考證

吳允誠傳命達蘭更名克忠襲爵

臣劉錫嘏按傳維

鱗明書云子伯克嗣伯賜名克忠史作答蘭彼此小

異謹識

吳成傳

金順附

金順本名阿爾噶錫哩

臣劉錫嘏按

金順傳維鱗明書作衛拉特人史畧之謹識

金忠傳封忠勇王

臣黃壽齡按金忠封王不言食祿

當屬脫漏後文並支二俸亦無根據矣考傳維鱗明
書云歲祿千石謹識

金忠傳帝曰去留任所欲耳

臣劉錫嘏按傳維鱗明

書云或言忠去必不返上曰朕推心待人何疑於忠
同此覆載任渠去留竟與兵數千遣去數日倖斬敵
人及畜產以歸上大喜曰忠朕之金日磾也推心數
語得帝王之度史作朕有天下獨少此二人耶語意
相反謹識

毛勝傳封南寧伯

臣劉錫嘏按毛勝封南寧不言食

祿當屬遺漏考傳維鱗明書云食祿千石謹識

毛勝傳謚莊毅

臣劉錫嘏按毛勝之謚史作莊毅功

臣世表同傳維鱗明書作忠壯彼此互異考典彙亦云毛勝謚莊毅誤作忠壯謹識

焦禮傳備禦遼東

臣劉錫嘏按李賢所撰焦禮神道

碑云宣德初以遼東密邇諸番命禮往守適與敵遇禮當陣生致賊酋餘皆潰散陞指揮使辛卯邊將以

指揮正僉戊戌平諸海寇卒用都督曹儀薦陞都
指揮使壬戌海西寇邊禮率兵禦之率士馬甚衆癸
亥命守寧遠乙丑以邊功進左軍都督仍守寧遠丁
卯襲敗敵於境外以奇功陞都督同知賚白金綵幣
較史為詳謹識

焦禮傳景泰四年賊二千餘騎犯興水堡禮擊走之

臣劉錫嘏按李賢所撰焦禮神道碑云景泰甲戌禮

復率兵北討生致渠魁一人獲牛馬尤衆進左都督
考景泰五年歲在甲戌史於禮進左都督之事云在
景泰四年且以為擊賊興水堡而傅維鱗明書又云
景泰元年破敵小團山斬獲數千年分戰地彼此互
異謹識

焦禮傳封東寧伯 臣劉錫嘏按東寧之封不言食祿
之數當屬遺漏考傅維鱗明書獻徵錄功臣世表俱
云食祿千二百石謹識

毛忠傳禽偽少師知院

臣劉錫嘏按偽少師原名哲

卜尊巴勒固偽知院原名奇徹岱見獻徵錄謹識

毛忠傳九年出托歡山十年征黑山寇皆禽其酋

臣

劉錫嘏按托歡山擒賊首旺扎勒特穆爾陞本衛指揮僉事黑山擒都爾伯台陞指揮同知俱見獻徵錄

謹識

毛忠傳侍郎李實使漠北還言忠數遣使通衛拉特詔
執赴京既至兵部論其罪請置大辟景帝不許 臣

劉錫嘏按獻徵錄云甘之內外守臣及其邊人俱為忠訟朝廷亦知其偽置之不問史祇云景帝不許而不詳其故謹識

毛忠傳封伏羌伯

臣劉錫嘏按忠封伏羌伯不言食

祿之數考獻徵錄傳維鱗明書俱云食祿一千石謹識

和勇傳召督効勇營訓練

臣劉錫嘏按効勇營考典

彙云成化二年十二月復立十二營凡十二萬人曰

奮武耀武練武顯武敢勇果勇効勇鼓勇立威伸威
揚威振威十二營內各分五軍三千統騎兵神机統
火器兵志畧同志又云命侯十二人掌之團營之法
又稍變謹識

和勇傳封靖安伯

臣劉錫嘏按和勇封靖安伯不言

食祿考傳維鱗明書云食祿千一百石謹識

羅秉忠傳封順義伯

臣劉錫嘏按秉忠封順義伯不

言食祿考傳維鱗明書云食祿千一百石謹識

欽定四庫全書

明史卷一百五十七

列傳第四十五

金純

張本

郭敦

郭璉

鄭辰

柴車

劉中敷

子

機

張鳳

周瑄

子

絃

楊鼎

翁世資

黃鎬

胡拱辰

陳俊

林鶚

潘榮

夏時正

金純字德修泗州人洪武中國子監生以吏部尚書杜澤薦授吏部文選司郎中三十一年出為江西布政司右參政成祖即位以蹇義薦召為刑部右侍郎時將營北京命採木湖廣永樂七年從巡北京八年從北征遷

左侍郎九年命與宋禮同治會通河又同徐亨蔣廷瓚
濬魚王口黃河故道初太祖用兵梁晉間使大將軍徐
達開塌場口通河於泗又開濟寧西耐牢坡引曹鄆河
水以通中原之運其後故道寢塞至是純疏治之自開
封北引水達鄆城入塌場出穀亭北十里為永通廣運
二閘十四年改禮部左侍郎越二月進尚書十五年從
巡北京十九年同給事中葛紹祖巡撫四川仁宗即位
改工部居數月又改刑部明年兼太子賓客宣德三年

純有疾帝命醫視療稍間免其朝叅俾護疾視事會暑
敕法司理滯囚純數從朝貴飲為言官所劾帝怒曰純
以疾不朝而燕於私可乎命繫錦衣獄既念純老臣釋
之落太子賓客八月予致仕去純在刑部仁宗嘗諭純
法司近尚羅織言者輒以誹謗得罪甚無謂自今告誹
謗者勿論純亦務寬大每誠屬吏不得妄椎擊人故當
純時獄無瘐死者正統五年卒贈山陽伯

張本字致中東阿人洪武中自國子生授江都知縣燕

兵至楊州御史王彬據城抗為守將所縛本率父老迎降成祖以滁泰二知州房吉田慶成率先歸附命與本並為楊州知府偕見任知府譚友德同蒞府事尋擢本江西布政司右參政永樂四年召為工部左侍郎坐事免官冠帶辦事明年五月復官尋以奏牘書銜誤左為右為給事中所劾帝命改授本部右侍郎而宥其罪七年皇太子監國奏為刑部右侍郎善摘奸命督北河運躬自相視立程度舟行得無滯會疾作太子賜之狐裘

冠鈔遣醫馳視十九年將北征命本及王彰分往兩直
隸山東山西河南督有司造車挽運明年即命本督北
征餉仁宗即位拜南京兵部尚書兼掌都察院事召見
言時政得失且請嚴飭武備帝嘉納之遂留行在兵部
宣德初工部侍郎蔡信乞徵軍匠家口隸錦衣衛本言
軍匠二萬六千人屬二百四十五衛所為匠者暫役其
一丁若盡取以來家以三四丁計之數近十萬軍伍既
缺人情驚駭不可帝善本言征漢庶人從調兵食庶人

就禽命撫輯其衆而錄其餘黨還以軍政久敝奸人用
貨脫籍而援平民實伍言於帝擇廷臣四出釐正之時
馬大孳息畿內軍民為畜牧所困本請分牧於山東河
南及大名諸府山東河南養馬自此始晉王濟嬖坐不
軌奪爵本奉命散其護衛軍於邊鎮四年命兼太子賓
客戶部以官田租減度支不給請減外官俸及生員軍
士月給帝以軍士艱不聽減餘下廷議本等持不可乃
止陽武侯薛祿城獨石諸戍成本往計守禦之宜還奏

稱旨命兼掌戶部本慮邊食不足而諸邊比歲稔請出
絲麻布帛輸邊易穀多者三四十萬石少者亦十萬石
儲備頓充六年病卒賜賻三萬緡塋祭甚厚本廉介有
執持尚刻少恕錄高煦黨脅從者多不免成祖宴近臣
銀器各一案因以賜之獨本案設陶器諭曰卿號窮張
銀器無所用本頓首謝其為上知如此

郭敦字仲厚堂邑人洪武中以鄉舉入太學授戶部主
事遷衢州知府多惠政衢俗貧者死不葬輒焚其屍敦

為厲禁且立義阡俗遂革禁民聚淫祠敦疾民勸弛其
禁弗聽疾亦瘳在衢七年永樂初坐累徵耆老數百人
伏闕乞留不得後廷臣言敦廉正召補監察御史遷河
南左參政調陝西十六年春胡濙言敦有大臣體擢禮
部右侍郎兼太僕寺卿偕給事中陶衍巡撫順天二十
年督北征餉仁宗即位以大行喪不齋宿降太僕卿旋
進戶部左侍郎兼詹事府少詹事宣德二年進尚書陝
西旱命與隆平侯張信整飭庶務當行者同三司官計

議奏行敦乃請蠲逋賦振貧乏考黜貪吏罷不急之務
凡十數事悉從之歲餘召還在部多所興革罷王田之
奪民業者令民開荒不起科建漕運議民運至瓜洲儀
真資衛卒運至京民甚便之敦事親孝持身廉同官有
為不義者輒厲色待之其人悔謝乃已性好學公退手
不釋卷六年卒官年六十二

郭璉字時用初名進新安人永樂初以太學生擢戶部
主事歷官吏部左右侍郎仁宗即位命兼詹事府少詹

事更名璉宣宗初掌行在詹事府吏部尚書蹇義老輟
部務帝欲以璉代璉厚重勤敏然寡學術楊士奇言恐
璉不足當之宜妙擇大臣通經術知今古者帝乃止璉
年卒為尚書諭以呂蒙正夾袋虞允文材館錄故事璉
由是留意人才識進士李賢轉相器授吏部主事後果
為名相時外官九年考滿部民走闕下乞留輒增秩復
任璉慮有妄者請覆實從之璉雖長六卿然望輕又政
歸內閣自布政使至知府闕聽京官三品以上薦舉既

又命御史知縣皆聽京官五品以上薦舉要職選擢皆不關吏部正統初左通政陳恭言古者擇任庶官悉由選部職任專而事體一今令朝臣各舉所知恐開私謁之門長奔競之風乞杜絕令歸一下吏部議譴遜謝不敢當事遂寢正統六年御史曹恭以災異請罷大臣不職者帝命科道官參議璉及尚書吳中侍郎李庸等被劾者二十人璉等自陳帝切責而宥之璉子亮受賂為人求官事覺御史孫毓等劾璉乃令璉致仕而以王

直代

鄭辰字文樞浙江西安人永樂四年進士授監察御史
江西安福民告謀逆事命辰往廉之具得誣狀福建番
客殺人復命辰往止坐首惡釋其餘南京敕建報恩寺
役囚萬人蜚語言役夫謗訕恐有變命辰往驗無實無
一得罪者谷庶人謀不軌復命辰察之盡得其踪跡帝
語方賓曰是真國家耳目臣矣十六年超遷山西按察
使糾治貪濁不少貸潞州盜起有司以叛聞詔發兵討

捕辰方以事朝京師奏曰民苦徭役而已請無發兵帝然之還則屏騶從親入山谷撫諭盜皆感泣復為良民禮部侍郎蔚綬轉粟給山海軍辰統山西民輦任民勞多逋耗綬令即山海貸償之辰曰山西民貧而悍急之恐生變不如緩之使自通有無用其言卒無逋者丁內艱歸軍民詣御史乞留御史以聞服闋還舊任宣德三年召為南京工部右侍郎初兩京六部堂官缺帝命廷臣推方面官堪內任者蹇義等薦九人獨辰及邵玘傳

啓讓帝素知其名即真授餘試職而已英宗即位分遣
大臣考察天下方面官辰往四川貴州雲南悉奏罷其
不職者雲南布政使周璟居妻喪繼娶辰劾其有傷風
教璟坐免正統二年奉命振南畿河南饑時河堤決即
命辰伺便修塞或議自大名開渠引諸水通衛河利灌
輸辰言勞民不便事遂寢遷兵部左侍郎與豐城侯李
彬轉餉宣府大同鎮守都督譚廣撓令劾之事以辦八
年得風疾告歸明年卒辰為人重義輕財初登進士產

悉讓兄弟在山西與同僚杜僉事有違言杜卒為治喪
資遣其妻子

柴車字叔興錢塘人永樂二年以舉人授兵部武選司
主事歷員外郎八年帝北征從尚書方賓扈行還遷江
西右參議坐事左遷兵部郎中出知岳州府復入為郎
中宣德五年擢兵部侍郎明年山西巡按御史張昺言
大同屯田多為豪右占據命車往按得田幾二千頃還
之軍英宗初西鄙不靖以車廉幹命協贊甘肅軍務調

軍給餉悉得事宜初多爾濟巴勒寇涼州副總兵劉廣
喪師不以實聞顧飾功要賞車劾奏械廣至京賜車金
幣旌其直岷州土官后能冒功得陞賞車奏請加罪能
復請命宥之車反覆論其不可曰詐冒如能者實繁有
徒臣方次第按覈今宥能何以戢衆若無功得官則捐
軀死敵者何以待之朝廷雖從能請然嘉車賢遣使勞
賜之正統三年以破多爾濟巴勒功增俸一級在邊章
數十上悉中時病同事多不悅車持益堅嘗言漠北

降人朝廷留之京師雖厚爵賞其心終異如青托克托
穆爾者昔隨其長來歸尋叛去今乃復來安知他日不
再叛宜徙江南離其黨類事下兵部請處之河間德州
帝報可後降者悉以此令從事稽覈屯田豪占者悉清
出之得六百餘頃四年進兵部尚書參贊如故尋命兼
理陝西屯田明年召還命與僉都御史曹翼歲更代出
鎮及期病甚詔遣大理寺少卿程富代翼而命車歸治
疾未及行六年六月卒車在江西時以採木入閩經廣

信廣信守故人也餽密一罌發視之乃白金笑曰公不知故人矣却不受同事邊塞者多以宴樂為豪舉車惡之遂斷酒肉其介特多此類

劉中敷大興人初名中孚燕王舉兵以諸生守城功授陳留丞擢工部員外郎仁宗監國命署部事賜今名遷江西右參議宣德三年遷山東右參政進左布政使質直廉靜吏民畏懷歲大侵言於巡撫減賦三之二正統改元父憂奪情俄召拜戶部尚書帝冲年踐阼慮羣下

欺已治尚嚴而中官王振假以立威屢撫大臣小過導
帝用重典大臣下吏無虛歲三年諷給事御史劾中敷
與左侍郎吳璽等下獄釋還職六年言官劾中敷專擅
詔法司於內廷雜治當流許輸贖帝特宥之其冬中敷
璽及右侍郎陳瑋請以供御牛馬分牧民間言官劾其
變亂成法並下獄論斬詔荷校長安門外十六日而
釋衛拉特入貢詔問馬駝芻菽數不能對復與璽瑋論
斬繫獄中數以母病特許歸省明年冬當決囚法司以

請命璽瑞戍邊中數俟母終具奏已釋為民景帝立起
戶部左侍郎兼太子賓客時方用兵論功行實無虛日
中數言府庫財有限宜撙節以備緩急帝嘉納景泰四
年卒贈尚書中敷性淡泊食不重味仕宦五十年家無
餘貲子璉正統十年進士授刑科給事中累官太僕寺
卿恥華靡居官剛果左遷遼東苑馬寺卿卒子機幼有
孝行成化十四年進士改庶吉士正德中代張綏為吏
部尚書以人言乞歸起南京兵部尚書參贊機務沅賊

犯江上衆議擇將適都督李昂自貴州罷官至機即召
任之昂以無朝命辭機曰機奉敕有云敕所不載聽便
宜此即朝命也衆服其膽識致仕歸卒

張鳳字子儀安平人父益官給事中永樂八年從征漠
北歿於陣鳳登宣德二年進士授刑部主事讞江西叛
獄平反數百人正統三年十二月法司坐事盡繫獄遂
擢鳳本部右侍郎以主事擢侍郎前時未有也明年命
提督京倉六年改戶部尋調南京適尚書久闕鳳遂掌

部事貴州奏軍衛乏糧乞運龍江倉及兩淮鹽於鎮遠
府易米鳳以龍江鹽雜泥沙不堪易米給軍盡以淮鹽
予之然後以聞帝嘉賞又言留都重地宜歲儲二百萬
石為根本計從之遂為令南京糧儲舊督以都御史十
二年冬命鳳兼理廉謹善執法號板張景泰二年進尚
書四年改兵部參贊軍務戶部尚書金濂卒召鳳代之
時四方兵息而災傷特甚帝屢詔寬恤鳳偕廷臣議上
十事明年復先後議上八事咸報可鳳以災傷蠲賦多

國用益詘乃奏言國初天下田八百四十九萬餘頃今數既減半加以水旱停征國用何以取給京畿及河南山東無額田甲方墾闢乙即許其漏賦請準輕則征租不惟永絕爭端亦且少助軍國報可給事中成章等劾鳳擅更祖制楊樾等復爭之帝曰國初都江南轉輸易今居極北可守常制耶四方報凶荒者鳳請令御史勘實議者非之英宗復辟調南京戶部仍兼督糧儲五年二月卒鳳有孝行性淳樸故人死聘其女為子婦教其

子而養其母終身同學友蘇洪好面斥鳳過及為鳳屬官猶然鳳待之如初聞其貧即賙給之

周瑄字廷玉陽曲人由鄉舉入國學正統中除刑部主事善治獄十三年遷員外郎明年帝北征郎中當扈從者多託疾瑄請行六師覆沒瑄被創歸擢署郎中校尉受賕縱盜以讐人代瑄辨雪之抵校尉罪外郡送囚一日至八百人瑄慮其觸熱三日決遣之殆盡景泰元年以尚書王直薦超拜刑部右侍郎久之出振順天河間

饑未竣而英宗復位有司請召還不聽復賜敕令便宜處置瑄遍歷所部大舉荒政先後振饑民二十六萬五千給牛種各萬餘奏行利民八事事竣還明年轉左帝方任門達達杲數興大獄瑄委曲開諭多所救正復飭諸郎毋避禍以故移部定罪者不至冤濫官刑部久屬吏不敢欺意主寬恕不為深文同佐部者安化孔文英為御史時按黃巖妖言獄當坐者三千人皆白其誣獨械首從一人論罪及是居部與瑄竝稱長者七年命瑄

署掌工部事瑄恬靜淡榮利成化改元為侍郎十六年
矣始遷右都御史督理南京糧儲捕懲作奸者數輩宿
弊為清鳳陽淮徐饑以瑄言發廩四十萬以振久之遷
南京刑部尚書令諸司事不須勘者毋出五日獄無滯
囚暑疫悉遣輕繫者曰召汝則至囚歡呼去無失期者
為尚書九載屢疏乞休久之乃得請家無田園卜居南
京卒贈太子少保謚莊懿長子經尚書自有傳次子紘
進士為南京吏科給事中兩以災異言事帝竝嘉納未

幾與御史張昺閱軍為中官蔣琮誣奏貶南京光祿署丞仕終山東參議

楊鼎字宗器陝西咸寧人家貧力學舉鄉會試第一正統四年殿試第二授編修久之與侍講杜寧等十人簡入東閣肄業鼎居侍從雅欲以功名見嘗建言修飭戎備通漕三邊二事同輩誚其迂鼎益自信額森將寇京師詔行監察御史事募兵兗州景泰三年進侍講兼中允五年起擢戶部右侍郎天順初轉左陳汝言譖之帝

不聽三年冬以陪祀陵寢不謹下獄贖杖還職帝嘗命
中官牛玉諭旨欲取江南折糧銀實內帑而以他稅物
充武臣俸鼎不可馬牛芻乏議徵什二又以民艱力沮
皆報罷七年尚書年富有疾詔鼎掌部事成化四年代
馬昂為戶部尚書而以翁世資為侍郎六年鼎疏言陝
西外患西寇內患流民然寇害止邊塞流民則疾在腹
心漢中僻居萬山襟喉川蜀四方流民數萬急之生變
置之有後憂請暫設監司一人專領其事其願附籍者

聽之不願者資遣兼與守臣練士馬修城池庶可弭他
日患詔從之湖廣頻歲饑發廩已盡及是有秋用鼎言
發庫貯銀布易米備災淮徐臨德四倉舊積糧百餘萬
石後餉乏民饑輒請移用粟且置鼎議上贖罪中鹽折
鈔徵逋六事行之由是諸倉有儲蓄尋加太子少保鼎
居戶部持廉然性頗拘滯十五年秋給事御史劾鼎非
經國才鼎再疏求去賜敕馳驛歸命有司月給米二石
歲給役四人終其身大臣致仕有給賜自鼎始也卒贈

太子太保謚莊敏子時暘進士累官侍講學士多識典故有用世才時數舉人廬墓被徵官兵部司務翁世資者莆田人正統七年進士除戶部主事歷郎中天順元年拜工部右侍郎四年命中官往蘇松杭嘉湖增織彩幣七千匹世資以東南水潦民艱食議減其半尚書趙榮左侍郎霍瑄難之世資請身任其咎乃連署以諫帝果怒詰主議者榮等委之世資遂下詔獄謫衡州知府成化初擢江西左布政使坐事下吏尋得白大軍征兩

廣轉江西餉需十萬人世資議齎直就易嶺南米民得不擾以右副都御史巡撫山東歲饑發倉儲五十餘萬石以振撫流亡百六十二萬人召為戶部右侍郎佐鼎久之代薛遠總督倉場進尚書十七年還理部事閱二年致仕

黃鎬字叔高侯官人正統十二年以進士試事都察院未半歲以明習法律授御史十四年按貴州羣苗盡叛道梗塞靖遠伯王驥等自麓川還軍無紀律苗襲其後

官軍大敗鎬赴平越遇賊幾死夜跳入城賊圍之議者
欲棄城走鎬曰平越貴州咽喉無平越是無貴州也乃
偕諸將固守置密疏竹筒中募土人間行乞援於朝且
劾驥等覆師狀景帝命保定伯梁瑄等合川湖軍救之
圍始解城被困已九年掘草根煮弩鎧而食之死者相
枕籍城卒全鎬功為多復留按一年久之遷廣東僉事
改浙江成化初以大臣會薦擢廣東左參政高雷廉負
海多盜鎬討平之再遷廣西左布政使以右副都御史

總督南京糧儲歷吏部左右侍郎十六年拜南京戶部尚書鎬有才識敏吏事理鹽政多所釐剔時論稱之十九年致仕道卒贈太子少保諡襄敏

胡拱辰字共之淳安人正統四年進士為黟縣知縣有惠政擢御史疏陳時弊八事父艱歸景帝即位詔科道官憂居者悉起復拱辰至屢疏以選將保邦修德弭災為言出為貴州左參政白水堡猺獍頭目沈時保素梗化拱辰言於都督方瑛遣將往禽之一方遂寧至畢節

平宣慰使隴富亂威行邊徼母憂去御史追劾其受
賕事下浙江按臣執訊事白調廣東歷廣西四川左右
布政使皆有平寇功成化八年拜南京右副都御史提
督操江十一年就遷兵部右侍郎儲位虛久與尚書崔
恭等請冊立言甚切其年復就改左副都御史總理糧
儲就進工部尚書節財省事人皆便之以年至乞歸宏治
中巡按御史陳銓言拱辰退休十餘年生平清操如一
日乞加禮異以勵臣節詔有司月給廩二石歲隸四人

正德元年年九十遣行人齎敕存問賚羊酒加賜廩隸
三年正月卒贈太子少傅諡莊懿

陳俊字時英莆田人舉鄉試第一正統十三年進士除
戶部主事督天津諸衛軍採草奏減新增額三十五萬
束豪猾侵蘇松改折銀七十餘萬兩俊往督不數月畢
輸尚書金濂以為能俾典諸曹章奏歷郎中天順五年
兩廣用兵俊督餉時州縣殘破帑藏殫虛弛鹽商越境
令引加米二斗軍興賴以無乏母喪不聽歸蠻平始還

初俊為主事奔父喪賻者皆却之至是文武將吏醵金賻亦不納成化初擢南京太常少卿四年召拜戶部右侍郎俊練習錢穀四方災傷邊鎮急芻餉奏請還至裁決咸當尚書楊鼎深倚之京師大饑先後發太倉粟八十萬石平糶石值六錢豪猾乘時射利俊請糴以升斗為率過一石勿與饑民獲濟尋議用兵河套敕俊赴河南山陝會巡撫諸臣畫芻餉發帑金二十萬助之俊以邊庾空竭歲又不登而榆林道險遠轉輸難乃發金於

內地市場修西安韓城同官徑道以利飛輓還朝進俸
一級歷吏部左右侍郎九載滿拜南京戶部尚書尋改
兵部參贊機務先是參贊之任不專屬兵部自薛遠後
繼以俊遂為定制久之就改吏部二十一年星變率九
卿陳時弊二十事皆極痛切帝多采納而權倖所不便
者終格不行明年乞致仕詔加太子少保賜敕馳傳還
卒諡康懿

林鶚字一鶚浙江太平人景泰二年進士授御史監京

畿鄉試陳循等評考官鶚邑子林挺預薦疑鶚有私逮
挺考訊挺實無他得白英宗復辟倣先朝故事出廷臣
為知府鶚得鎮江召見賜膳及道里費諭所以擢用意
鶚感激革弊舉廢治甚有聲漕故經孟瀆險甚巡撫崔
恭議鑿河自七里港引金山上流通丹陽避之鶚言道
里遠多石且壞民廬墓請按京口開甘露壩故迹濬之
令通舟春夏啓閘秋冬度壩功力省便恭從其議遂為
永利居五年以才任治劇調蘇州成化初超遷江西按

察使有犯大辟賄達官求生者鶚執愈堅廣東寇劉贛
州急調兵禦之遁去廣信妖賊妄稱天神惑衆捕戮其
魁立解散歷左右布政使歲饑奏減民租十五萬石成
化六年擢南京刑部右侍郎母憂服除召為刑部右侍
郎執法不撓十二年得疾卒鶚事母孝謹對妻子無惰
容不妄交與公餘輒危坐讀書歿不能具棺斂友人為
經紀其喪鶚在蘇州先聖像剝落鶚曰塑像非古也昔
太祖於國學用木主命改從之嘉靖中御史趙大佑上

其節行贈刑部尚書謚恭肅

潘榮字尊用龍溪人正統十三年進士景泰初擢
師廣東還除吏科給事中疏論停起復抑奔競數事
帝納之尋進右給事中四年九月上言致治之要莫切
於納諫比以言者忤聖意諭禮部凡遇建言務加審察
或假以報復具奏罪之此令一下廷臣喪氣以言為諱
國家有利害生民有得失大臣有奸慝何由而知況今
巨寇陸梁塞上多事奈何反塞言者路望明詔臺諫知

無不言緘默者罪竝敕閣部大臣勿搜求參駁虧傷治體疏入報聞天順六年使琉球還遷都給事中成化六年三月偕同官上言近雨雪愆期災異迭見陸下降詔自責躬行祈禱詔大臣盡言宜上天感格而今乃風霾晝晦沴氣赤而復黑豈非應天之道有未盡與夫人君敬天不在齋戒祈禱而已政令乖宜下民失所崇尚珍玩費用不經後宮無序恩澤不均爵濫施於賤工賞妄及於非分皆非敬天之道願陛下日御便殿召大臣極

陳缺失而釐革之庶災變可弭時萬妃專寵羣小資緣
進寶玩官賞冗濫故榮等懇言之帝不能用是年遷南
京太常少卿又七年就擢戶部右侍郎尋改右副都御
史總督南京糧儲積奇羨數萬石以備荒十七年召為
戶部左侍郎尋署部事英國公張懋等四十三人自陳
先世以大功錫爵子孫承繼所司輒減歲祿非祖宗報
功意榮等言懋等於無事時妄請增祿若有功何以勸
賞况頻年水旱國用未充所請不可許事乃寢中官趙

陽等乞兩淮鹽十萬引帝已許之榮等言近禁勢家中
鹽詔旨甫頒而陽等輒違犯宜正其罪帝為切責陽等
南京戶部尚書黃鎬罷以榮代之孝宗嗣位謝政歸賜
月廩歲夫如制九年卒年七十有八贈太子太保

夏時正字季爵仁和人正統十年進士除刑部主事景
泰六年以郎中錄囚福建出死罪六十餘人中有減死
詔充所在濱海衛軍者時正慮其入海島為變轉發之
山東然後以聞因言凡福建減死囚俱宜戍之北方法

司是其言而請治違詔罪帝特宥之時正又言通番及劫盜諸獄以待會讞淹引時月囚多瘐死請令所司斷決詔從之且推行之天下天順初擢大理寺丞久之以便養遷南京大理少卿成化五年遷本寺卿明年春命巡視江西災傷除無名稅十餘萬石汰諸司冗役數萬奏罷不職吏二百餘人增築南昌濱江堤及豐城諸縣陂泝民賴其利嘗上奏不具齎奏人姓名吏科論其簡恣帝宥其罪錄彈章示之遂乞休歸僦居民舍布政使

張瓚為築西湖書院居之家食三十年年近九十而卒
時正雅好學閒居久多所著述於稽古禮文事尤詳
贊曰金純等黽勉奉公當官稱職加之提躬清白操行
無虧固列卿之良也鄭辰之廉事周瑄之治獄皆有仁
人之心君子哉

明史卷一百五十七終

欽定四庫全書

明史卷一百五十七考證

金純傳九年命與宋禮同治會通河又同徐亨蔣廷瓚
濟魚王口黃河故道 臣黃壽齡按是年與純同治
會通河者尚有都督周長見明實錄謹附考

鄭辰傳正統二年奉命振南畿河南饑時河隄決即命
辰伺便修塞 臣黃壽齡按鄭辰之命振饑在正統
二年六月見明英宗本紀傳作元年誤謹附考

楊鼎傳六年鼎疏言陝西外患西寇內患流民 臣黃

壽齡按是時為陝西邊患者阿勒台多爾濟巴勒而
已無所謂四寇考獻徵錄作西寇於當日時事較合
蓋西無四色相近訛耳謹據改

胡拱辰傳白水堡犴狁頭目沈時保素梗化拱辰言于
都督官方瑛遣將往禽之 臣黃壽齡按方瑛擒叛

苗在景泰三年十一月見明本紀但是時瑛為都督
至七年十一月討湖廣叛苗始加平蠻將軍充總兵

官傳誤謹改

潘榮傳景泰初擢師廣東還除吏科給事

臣黃壽

齡按明本紀廣東黃蕭養之亂在正統十三年八月
維時天順已為衛拉特所獲至景泰元年五月都督
同知董興始擊滅之榮之擢師當在是時則非正統
間事矣廣東景泰初三字應移廣東句上敘事方合
謹改

明史卷一百五十七考證